



SYNOD KIKHAWMPI 3-VEINA (NOVEMBER 19-24, 2024)



To,

If undelivered please return to - TPC Office,
P.O. Box - 107
D. Phailian,
Churachandpur - 795128
Manipur, India



CHAMNA LAL A PIANG TAI

- Kum 2023 & 2024 Nungthîlna
- Kumthak Kisaklawkna
- Lenkhawp leh Khanglaite

Editor : Rev. S. Lama Vaiphei, Executive Secretary

Joint Editors : Rev. P.B Zosapthara, Consultant
: Rev. K. Jama Vaiphei
: Rev. Th. Samuel Vaiphei
: Upa Lalminsang
: Upa S. Lalpi
: Pi Hawipakkim, Secretary, CKNP
: Tv. Lianmuanthang, Secretary, CKKP

Business Manager : Pu Langlalthamuan
TPC Office D. Phailian
P.O. Box 107 CCPur-795128 Manipur
Phone No. +91 9958160325
Email - ehinnavak@gmail.com

Kum khat lak man : Rs. 150.00

A man pia nuam leh a la thak nuam ten Business Manager kianga hiatsak ding.

A SUNGAH THU UMTE

- | | |
|---|----|
| 1. EDITORIAL | 01 |
| 2. KOCHUAM HUANG | 02 |
| 3. CHAMNA LAL A PIANG TAI | 04 |
| 4. KUM 2023 & 2024 NUNGTHILNA | 08 |
| 5. KUMTHAK KISAKLAWKNA | 13 |
| 6. LENKHAWP LEH KHANGLAITE | 17 |
| 7. SERMON | |
| a) Lalpa lungdamna | 20 |
| b) Mani dinmun hiat hi midangte dinmun hiatna le a hi | 23 |
| c) Ei an kipak a um | 25 |
| d) Tuihing lui | 27 |
| e) Literature pawimawna | 30 |
| 8. KNP HUANG | 35 |

SYNOD PUIPATE

Moderator	:	Rev. Vanlalchhuanga
Secretaries	:	Rev. Andrew LR Khiangte (Sr.) Rev. Summinlian (Jr.)
Finance Officer	:	Upa Tinliankham
Statistician	:	Rev. Thianganlim
Executive Secretary	:	Rev. S. Lama Vaiphei
Consultant	:	Rev. P.B. Zosapthara

Hinna Vâk ah thu kisua zosia hi Editor ngaidan a hi suak puai

Pauchapna Thupi:



1. Tangphai Presbyterian Church Provisional Synod Kikhawmpi 3-veina chu lawting tak ah nei zaw a hi ziak in kipakthu gen hitiu. Chuleh, Synod puitu thakte leh committee bâk chuam chuam ah mawpuakna neite'n Thagau thiangtho umpina tawh a mawpuakna'u a zaw chiat theina ding un dawn hitiu.
2. Pathian mapuina zal in Kum 2024 kumtawp i tung kit ta, Pathian in mimal tin leh Kochuamte muthei leh mutheilo ah ei mapuinate ngaite in kipak thu gen hitiu.
3. Kochuam tin ten Khristmas leh Kumthak hi Thagau lam malzawlina tamtak tawh buaina umlo ah i mat chiat theina ding un dawn hitiu.
4. Naupang Sunday School Kumtawp Exam, Carol Programme-te lawting tak ah i nei theina ding un dawn hitiu.



COUNCIL FOR WORLD MISSION (CWM) WORKSHOP

CHAMNA & MUANNA

HinnaVak simtute zosia Khristmas chibai.

I gam a buai ah, i namsung a hung buai kitzel ah, kochuam mite â ding inle chawldam a umlo khawp mai hi. A hinla, midamthei ten doctor a mamaw puau ah, mihi sellote ma chu doctor mamaw ahi ti ahi gual a khan; Chamna Lal mamawtu i hinau suchiantu a hi ti di hi'na. Hebrai pau a chun SHALOM a tiu a, Sapte ledaw dan a chun PEACE ti a hi. Zia umzia chu kidolo, kikaptualo, kibuailo tite a kawkdawk thei hi. Amavang, Shalom umzia gil tak chun zia sanga thûkzaw chu a kawk hi. Ei pau ah i genthiam thei dan ua chun CHAMNA & MUANNA ti leu hen kawkdawk pen ding in ginchak a um hi.

Gam leh gam kidolo chu kicham guala ngai a hia, nam leh nam kidolo chu kicham guala ngai a hi sek hi. Tulai pau a chun ceasefire a tiu a, zia hi i pu leh pa teu in hiamkhamna a tiu kha hi ding a hi. 1997 lai ah Thothong gâl ti ah i hiat uh khale, kichamna suai a kai ua, i kicham tau a hi. Ahiziakin, tuni tiang ahin a puakkek thei ding bomb kiphum nalai um hileh kilawm tak in giksak tak in bouruak a um zing nalai hi. Chuti ahileh i lak ua hin kichamna chu a um a, muanna aum nai puai ti ding in a lang hi.

Lei leh van kichamna ding ah hung Chamna Lal hi chu SHALOM chamna leh muanna bukim i nei theina ding ua hung a hia, a hung bep hilo in zia nasep chu a thichil ahi. I Lalpau Jesu chun a nungzuite kiang in, ***“La chung un thamuanna um ta ben”*** (Luke 24:36) a ti a khan, zia SHALOM hi a mang a hi. Tukum Khristmas ahin i lak un kichamna leh lungmuanna bukim hungtung henla, buaisiatlo zia ah kicham mai mai hilo, kikaptualo zia ah kicham mai mai hilo, kinaksiatlo zia ka kituak gual ah lang mai mai hilo, mitin lungsung ah chamna leh lungmuanna khawvel in a piak theilo chu Chamna Lal in a hung pua, kisan chiat hi tiu. Khristmas mat nuam!



Kochuam Huang

CWM Workshop

Council for World Mission (CWM) South Asia Youth sung ah Workshop on Peace & Development Programme October 26-29, 2024 Kolkata ah um chu Tangphai Provisional Synod ai-aw in Nk. Tingsiamkim, CKKP Treasurer a va pangthei hi. Zia Programme ah Palai chiakhawm dan chu-

PCI	-	8 Synod
CNI	-	8
CSI	-	7
Bangladesh	-	1
Total	-	24

Synod Kikhawmpi

Pathian ei mapuina zal in Programme siam gual tak in Synod Kikhawmpi 3-veina chu November 19-24, 2024 sung in S. Munnuam Kochuam Biak In, S. Munnuam Pastor Bial zintunna'n lawting tak in matzaw a hi. Zia Kikhawmpi ah hin vaihawm palai 311 tuam vel chiakhawm in, i Kochuam maban ding leh chia zelna ah sep ding pawimaw tak takte genkhawm a hi.

Synod Kikhawmpi 4-veina chu Gangpimual Kochuam Biakin ah, Gangpimual Pastor Bial in a zintun ding in siamlem a hia, a hun ding in November 17-23, 2025 guat a hi.

Auditors dingte

Kum 2024 – 2025 â ding ah Synod Office leh department chuam chuamte ah sum endiktu (Auditor) ding in Upa N. Lamzathang (Sr.), Hill-Town leh Upa Kaikhokam Vaiphei (Jr.), Jubilee guat a hiu.

Pastoral Ministry thupi

Kum 2025 sung ah Tangphai Provisional Synod Pastoral Ministry thupi ding in **Chamna siamtu** ti hi têt a hi.

Office kikhâk ding

December 19, 2024 ah kipat January 7, 2025 sung hi Khristmas leh Kumthak chawl a hi dungzui in Synod Office kikhak ding a hi. Kochuam thil pawimaw chi chuam chuam – Sunday School Zillaibute, Nilai Zan & Beigual Thupi bu, Calendar, Pathian Gam Thilpiak bawm, etc. leh Office ah lâk ding neite'n zia chawl hun masang ah hin lâk thei hi'n

HINNA VÂK

a. Office kihawn hun sung hi
10:00 a.m. – 3:30 p.m. a hi.

Pathian Thu Exam

A hung tung ding December 15, 2024 (Pathianni) hileh Sunday School Pathian Thu Examna gambuai ziak in a sukkhaklo ah nei thei ding zosia’n nei ding ahia, Dawtna leh dawnhuna lekhat chu Office in a hung thawtdawk ta, Bial Sunday School Secretary te’n a la ngaiven chiat hitiu. Kumkhat sung Pathian thu kizilte Examna hi lawting tak ah zaw a hitheina ding in Kochuam te’n Pauchapna’n delzui hitiu.

Khristmas Carol Programme

December 20, 2024 ah Naupang Sunday School Carol Programme di Office lam in a hung guanggal chu Kochuam tinten mangthei sau sau ding ah kineppi i hui, Taksa leh Thagau ah lawting tak ah mang thei chiat ding in kisingsa hitiu.

Hinna Vâk Agent chungchang

Kum 2025 sung ah Kochuam tinte’n eima Kochuam chiat ah Hinna Vâk Agent thak dite min leh contact no. December 2024 thasung ah Synodd Office ah hung pelut ding in i kichial ui.

Chuleh, Agent te subscription fee (lakman) chungchang hi “Hinna Vâk latu hi Kochuam sung ah Inkuan um Zosia zat kimkhat a hi chun a thawn ah Agent in dawng thei ding” a hi thu le i kihatsak ui. (Hinna Vâk Editorial Board Meeting 6:IV)

Synod Palaite

PCI nuai ah Synod chuam chuamte Kikhawppina ei uh Provisional Synod thasang ah va pang ding in a nuai ah gual hin palai dingte guat a hui:

i) 2025 Mizoram Synod

- a) Rev. Thanglianlal,
New Lamka
- b) Upa Sawnmang, *Jubilee*

ii) 2025 Manipur Synod

- a) Rev. Kamkhotinthang
Neihzial, S. Kawtlian
- b) Upa Genminlun,
Pengjang

iii) 2024 Zou Synod :

- a) Rev. S. Lama Vaiphei,
Executive Secretary
- b) Upa Lianlalgo, *Kangvai*

iv) 2025 Zou Synod :

- a) Rev. Thianganlim,
S. Munnuam
- b) Upa Siakkap, *Kawlhen*

“CHAMNA LAL A PIANG TAI”

(Isai 9:6; Galatia 4:4)

~ Rev. Siamlaron
Aizawl Theological College

*Amasa’n simtu zosia Lal Jesu min in Khristmas chibai ka hun
bûk hi!*

Gam buaina leh haksatna chuam chuam te’n ei chup sek maleh tuni tiang ah Pathian nasepna sunzawm thei ding leh a thu-leh-lâ ngaitua khawm thei nalai ding ah hunpha ei pia Pathian kiang in kipakthu ka gen hi. Tulaitak ah mimal, sungkuan leh a diak ah i gam un i pawimaw uh chu **chamna** ahi kiti leh kigenkhial ding in ka gingcha puai. Khawvel ah chamna kigen minthang tak *Roman Peace (Pax Romana)* kiti a um ah, zia chu sepai thahatna mang ah kichamna a hi. Ziaziakchun a pang sawt pua, pawlam kichamna bep a hi. Ahinla, tuni hun ah ei uh a ding ah hung piang Chamna Lal kigen hi, Pathian leh mihingte kikal ah kichamna, mihing leh mihing kikal ah kichamna leh mihingte leh khawvel chung ah chamna lopi tak thu a hi. Zia dungzui a chun thupi pawimaw leh a hun tawh kituak ma ma - **“Chamna Lal a piang tai”** ti thupi hi ngaitua khawm ding i hiu.

1. Chamna Lal chu kua ahia, bangziak ah Chamna Lal kiti ahi em?

Thilsiam Thu lam ah a kimu gual in mihingte zia in gitlona khawvel in a hung um ah (Thilsiam Thu 3), Pathian

tawh kicham thei talo ding i hilai un a hepina hung latsak in, Lal Jesu zia in kichamna a hung um kit thei ta a hi (Rom. 5:6-10). Kichamna kiti zosia hi a thawn a um pua, kua a h’em khat in a man a piak

HINNA VÂK

ngai a hi. Zia chu Lal Jesu'n a hung piak zia in Chamna Lal ti min sak a hi. Ama bep hi ahi khawvel leh mihingte chung ah chamna bukim (*shalom*) hung tuntu chu.

2. Zawlneite leh Chamna Lal

Chamna Lal hung piang ding thu leh lopitak ah chawihawi ahi ding thute hi Zawlnei (Isai, Micah leh Zekariah) te'n kum tamtak masang khan ala genlawk tau a, genlawk ahi dungzui in a tak ngei in, a hun tak in khawvel ah a hung piang hi. Zia chu tuni tiang in a hiatpitu, a muchiantu leh a nungzui tute i hui. Zawlneite bep hilo in, Galatia zik inle a gengual in Lal Jesu hi a hunbi a hung tin hun ah hung piang ahi ti a kimu (Gal. 4:4). *Pathian hi kinaw ngailo ahinla vaigei ngailo, a pawimaw hun laitak leh a hun chet ah tawi sek a hi ti a kichian na le a hi.*

3. Chamna Lal hungpiang hi la nei ta em?

Chamna Lal - Lal Jesu chu Lal leh Hukdampa ding ah

lanei masang sia Pathian tawh kichamna nei theilo ding la hi. Kum tam tak chia ta khan Lal Jesu'n nang leh kei Pathian tawh kicham na ding in thina mang in ei la tandawk ta. Zia chu ging ah kumtuang hinna nei ding (Jn. 3:16) leh ginum tak ah a nungzui ding in ei daw hi. Ziakiachun, Chamna Lal hung piang i kipakpi zing kawm in, Lal leh Hukdampa ding ah pawm nailo ten lungthim siamfel in, pawm na hun in mang thei leu hin mi vangpha hi ding i hui.

4. Nang leh kei a ding ah hung piang a hi

C.S. Lewis chun, "Lal Jesu hung pian hi khawvel khangthu ah thil tung lak ah a lailung pen lua tu a hi" a la ti hial a hi. Lal Jesu hung pian ah kipat in khawvel khangthu sim dan leh gendan a kisang danglam tawpmai hi. La phuaktu pakhat in, "khawvel ah hin Lal tam tak a piang tau ah, ahinla Lal Jesu gual ah piang hi a um nai puai" ati gual in mihing ah hung piang lak in a danglam diak hi. Zia zosia hi

Pathian in mihingte a hepina lopi tak a hung kilatsakna ahi ti chu kichian tak in i muthei ui. Leng leh Lal tamtak ten a sepai teu thahatna mang in lopina leh minthanna a nei ua, ahinla a mau vaihawmna gam khêl inle a minthang un a thunei tak tak zo puau hi. Lal Jesu'n ahile chu *kingainiamna te, thunuaigawlna te, hepina te, ngaidamna te, kinepna te* tawh khawvel khangthu a hung sang danglam ah, tatna nasep lopitak leh kichian tak mai, khawvel ah umkha nailo chu mihingte hiat leh muthei ngei ding in a hung sêm bukim tai. Zia haw zosia hi nang leh kei ei hepina zia a hi ti hechian thak in, a sôlnung ginum tak in zui thak leu hin nawp a um hi.

5. Chamna Lal hung piang i lawp zinglai ua i kietthak na ding ua pawimawte:

- 1) I Lalpau Jesu Khrista zal in, Pathian tawh kicham in i um tau hi (Rom. 5:1), a nungzui i hi zing lai un, Ama tawh i kicham zing

nau em ti kienthak zel hitiu. Pathian tawh kichamlo ah a nungzui i hi khak chun mimal leh midang kikal ah kichamna um thei puan tin, dam zing kawm ah hinkhua haksa tak ah mat zing thei a hi. Lal Jesu pian lawm ah nuam sa ma ma, Ama neilo pi i hi khak ding uh kiveng hitiu. ***Pathian neilote'n le lopitak in a lawm sek ui.*** Ziaziakchun, Ama nei ah a nung ginum tak ah zuitu hi ding in pan la thak hitiu.

- 2) Chamna Lal nei diktak te chun a kîm-leh-kiang un chamna leh muanna a tun sek ui. Chamna Lal nei ah, a nung zui diktak te chun zia khawvel ahin *dikna te, thunuaigawlna leh kingaitawmna te* tawh gam a la sek ua, midang ten ama tawh *hinkhawm, khawsakkhawm leh sepkhawm* nuam a sa sek ui. Ziagual mi chu hi ding in Chamna Lal hung piang hi i lunggil chiat un pianthak sak hitiu.

HINNA VÂK

3) Lal Jesu'n khawvel ah a leng lai in mimal, insung leh gamsung ah chamna leh muanna a tun hi. Zia bep chu hilo in khawvel in a piak theilo kumtuang dai ding *kumtuang hinna leh chamna* ei nutsia piak nalai a hi. Ziaziakchun, Ama neitu leh zuitu diktak te chun mimal ah chamna nei in - insung, kochuam, namsung leh khawtang tiang ah chamna leh

muanna tunsaktu a hi sek ui. Ziagual mi chu hithei chiat ding in tuchung Chamna Lal hung piang kipakpina *Khristmas* hi lungthim thak tawh mang hitiu.

Chamna Lal hi *mimal, sungkuan, kochuam, khawtang, namsung leh gamsung* in a *hung piang tai* ti thei chiat ding in simtu zosia Lalpa'n malsawm ta hen.

KHRISTMAS MANTAM

- ▶ Mari leh Joseph chun a In lum uh nusia in nausen Jesu venbitna ding in hunsawtpi Aigupta gam lam ah a jam uh a ngai hi.
- ▶ Bethlehem ah Nu tamtak in a chate'u sôn in a kap u'i, Leng Herod in nausen kum ni apat a nuai lam zosia tha ding ah a thupiak ziak in.
- ▶ Belampute lungdam leh lungawitak ah a belamching lai uh nusia in thu kipakum, gan ankuang ah Nausen Jesu a um thu hil ah a um ziak un.
- ▶ Saklam mipilte chu gam gamla tak ah khualzin ding leh thilpiak mantam tak pe ding in a um khawlaw u'i.
- ▶ Sawlchak masate leh Kochuam

masate khan sukgentheina leh thina a la tuak khawlaw u'i.

- ▶ Chanchinpha puang ding ah kuandawk Missionary-te hawn chanchinpha ziak in gensenlo sukgentheina leh haksatna a la tuak khawlaw u'i.
 - ▶ Khristiante hawn Khrista zal in naupang leh piting tiang in martyr a la chang uh a hi.
 - ▶ Zia haw zosia sang inle, Pa Pathian in a Chapa neisun khawvel hukdam ding in a hung sawl khawlaw a hi.
 - ▶ Jesu ngei le hinkhua kipiazio tak leh a mite â ding ah nasem in, khang hung tung zel ding ah le tung talo ding khawp hial ah huaisia thina a thuak hi.
-

“KUM 2023 & 2024 NUNGTHILNA”

~ Rev. S. Khaikholam
Kangvai

Nungthilna i ti hi, hun chiatasa ah thil umte etkitna, ngaitua kitna ahia, zia thil tungte ah kipat ah i bawl phat zawlona teu a phazaw bawl theina ding ah tuhun leh hun hung tung ding ah kisiampnatna leh panlak theina ding ah thil pawimaw tak a hi. Ziagual ah kietphatna chu mimal bep hilo in, pawl in le a pawimaw a, taksa khawsakna lam bep hilo in thagau lam hinkhua tiang inle ziagual ah nungthilna i nei uh a pawimaw hi. Ziagual ding a chun kum 2023 & 2024 nungthilna nei hitiu:

1. Mimal dimun: A kâl lak in unau Meiteite leh eiu thingtang mite kikal in kihiatthiamlo nate leh kinawk tuanate a la um thim thim sek maleh Namlian Meiteite (general) chu a lung lian un a dawzo ua, bangma buaina lian um sam puana tiin amau tawh ki gamgi chin Kangvai in kala cheng lut ah, kei gual gual lungthim pu tamtak te chu Imphal leh a seh vel ah i la kikhual det ua, ahinla

i ginchat guallo tak ah thil hung tung in ziagual chu i hung himai tau hi. Gal leh tual nei ah kido i ti haw hi mawllai hun a ding ah i kawih leh, mi nam changkang tak tak te le ala kido tho ua, ziahin chu Lalpa hungkit nading nai dan ei hiatsak ma ma hi. Tu khêl tu ban ah In leh lo tawh kikhualna mun di telna a chu midang nam dangte le lau bawl deu di ahi dan le ei zilsak hi. Ziagual kidonate haw hi

HINNA VÂK

migilo khenkhatte zia ah a
lang gel ah kipat ah utlo sa
sa ah kidona mun ah kailut
ah ki um thei ahi dan leh
nam thil ahi chun a kua le
i thisan lum bai ten ahi dan
le ei muchian sak hi. Chuleh
thil neucha cha haw a bul
lam ah i la mek thip seklo
zia ah buaina lian tak tak
hung piang daw k ziang sek
ahi dan hile ei hiatdaw sak
kit hi.

2. Kochuam malâkna: Gal
zia ah In leh lo kâng ah
hung zam daw k, relief
camp ah um zing thei le
hilo ah lungngai thavaite
chenna In di sak piakna
leh sawmdawl na chuam
chuam ah i kochuam
in nasa tak ah pan la
in, June 2024 tiang in
Rs. 4,34,97,543 tiang i
seng daw k zo ui. Ziagual
tiang ah kisawmdawl
na lam ah i kisen lai ua
le semtute lawmman te
le buailo in i kipiathai
zel ua, S.Munnuam leh
Mata leh Lingsiphai ah
gam Rs. 20,700,000 man

i chawdaw k thei nalai ua,
Delhi lam a le a crore tel
man in chaw k i gua nalai
uh a hi. Thei kham kham ah
i thilpiak teu zal ah ziagual
tiang ah kisawmdawl thei
leh ki su buldet thei ah i um
na teu hi a lopi khawp mai
hi - Lalpa lopi pen ta hen!

Ziahin chu Lalpa nasep
na ah kithugual tak ah i
pankhawm nak chun na
lopi tak tak sem thei i hidan
uh ei muchian sak hi. Tasam
leh mamawte a ding ah
ziagual ah i luanthak zing
lai in midangte ah kipat in
eiu a ding in panpina Rs.
1,51,45,442 a hung luang
lut hi. Chuleh i buai limlai
ua muntin ah i kichek zak
zia ua thilpiak lam ah i
kiakniam nau khale tuhin
a hung kidia dua daw k
kit thei ta, a pangai gual
in i sunglut thei kit tau a,
thamuan a um in kipak a
um khawp mai hi.

A da um ma ma chu ahi
leh Phaipi Presbytery sung
a bial 3 te a din thei taklo

ziak in Phaipi Presbytery a ding thei tapuai. Bial 2 te chu nak nak in a ding ham ham hi. Phaipi Presbytery a din thei taklo zaak in Presbytery ai aw ah Synod Committee chuam chuam ah mamberle le a kichawl mai uh a hung ngai ah, zia ban a chun, a Presbytery sung a Upa, Lamka lam ah hung um dawke te chu active Upa a hung hiziang thei puau ah, pêm Upa a hung hi phawt mai uh a ngai hi. Nei le go zosia chên ah zia gual ah hung zam dawke a, pêm Upa hung hi kit naklai hi chu a da um sawn sawn hi. Ahinla zia hi chu i dan u haw kim a kul na zaak ahia, active Upa ah siam kit thei chu a umnau kochuam te ahia ah, a dinmun uh hiatthiampi ah ma lak chu i mawpuaknau a hi.

3. Gam leh Nam dinmun: I gam ah mite'n thingthet sanawl bang ei bawl ah ei nawdaw a guat lim lai ua i thaphan dan teu kha

maw, Central government bek in ei hukbit mai ding ah i kinep lai ua ni 15 sung hung ki bawl phawt nalai un ti hi awm tak ah ei kikap sak mai uh, matchak a le tamtak ah nei hawi zawte chu government matchak tampi tak dal tu umlo ah piak hinalai uh, thaphanlo di gual chu hilo a hi. Himaleh hiti tiang ah i gam i hukbit thei naklai hi chu, Pathian ei lam ah a pan zaak ahi i ti lo thei puau. I gam ah Khristianna dengdel deu deu ah hiatna a um ah, sawisakna le a hat deu deu hi. Ziahin i thaphan nau a belap lo thei puai. Ahinla, Pathian thil gel dan te a mak sek hi. America te President kitel na ah kuaman a kineppi ngam taklo uh Donald Trump chu Khristianna a chawisan zaak in Pathian in a umpi a, 2 vei set thi dingah kap a hi lai inle a thi pua, President a hung ting mai hi chu Pathian in a umpi zaak ahi ti a kichian ma ma hi. Result

HINNA VÂK

puan a hi ah ama support tu ten “O Lord my God” ti ah Pathian chawihawina La a sak zua zua u khan lung a khawi ma ma hi. Tuhin khawvel gam puitu chuam chuam te’n mi gum Donald Trump chu kilanpi ngamlo in a maipha a hawl sau sau tau hi. Eiu a pa Modi ngei inle ‘Ka lawipa’ a la ti ve sam hi. Ziaziak a chun Donald Trump tinna zal ah eiuh a Khristianpita a ding natiang in bit zaw kisakna le a um ban ta hi. Chuleh Khristian tamtak ten Donald Trump chu Khristian sakhua tungding kit ding leh vengbit ah hat sak ding in kinepna liantak a nei ui.

4. Kidonate: Kum chiata sungah mun chuam chuam ah kidonate chu a huaise diak a bang hi. Myanmar ah sepai ten thuneina a pawng lak ziak ua sepaite vaihawmna khawp talua mipi te nuam talo ah a pansal ziak ua government sepai te tawh a kido mai

nau hi a nasa khawp mai hi. A lim lai ah mipi lam chu khut ngawn ah thangtawm man ah government sepai te tawh kido gual hileu le tuhin a gualzo zaw di le a hung bang hial tau a, Pathian umpina chang hi ngei inau.

Russia leh Ukraine kidona hile a nasa khawp mai ah, USA leh NATO member khenkhat ten Ukraine chu pukse hial lo ding tiang in a panpi zel ua, kido ziak ah siatna tung te chu a huaise thei khawp mai hi. USA lam in Ukraine panpina a ha piak deu phatu leh Russia chun nuclear weapon mat khum ding in a vau sek ah, himaleh tuni tiang ah nuclear weapon ki mat khumna chu a um em sam puai. Donald Trump chun gal van panpina lam pia talo ah kichamna umthei nading ah gam puitute le kihopi in pan lak to zel a guat thu hiat a hi.

Hamas ten thakhat lo pi Israelte kigin lo kal ah tampi va that ah tamtak a hing mat ziak ua Israel te lungnatna dai theilo in a suksiat a nasa ta khawp mai hi. UNO thu natiang te ngaikhawklo ah a vel ua Gaza leh Lebanon ah a melma teu amau do ding ah dingkit zo talou ding ah suk chimit gua a do nateu thawm a lian ta khawp mai hi. Israel te lungchang khawk dan leh a lung khawk ziak ua melma gam tamtak amau do dingah a hung ki thugual dan teu haw i et veng veng leh hun nunung ah Bible in kidona hung umding a gen te kha hung tung di ahi ta diam ti ahun gel sak ma ma tai.

A chung ah kidonate hi Donald Trump in office a hun lua phat leh sukthip di a gen gual in bangtin pan a hun la to zel diam ti chu khawvel bil daw ahi tai. Ahiloleh khawvel chu a hung kuang zak zaw mai

diam ti le a lau um la diak puai. Chuleh i khawvel ah buaina um te i vak thilna a kipat a chun i gam puitu khenkhat teu vision gual ah eiu thingtang mi Burma leh India ki gamgit na tuam ah umte leh Bangladesh ah umte vaihawmna khat nuai ah um khawm khawng di i hi diam uh tina le a um tai.

Thukhakna: Kum chiatasa i thîlnau ah thil kipakna lam ah galzamte In di i sak piak uh tilo gendi um beklo in kidonate ziak ah a lungjin um leh a thaphan um lam ngawn i gen ua. I neu apat khawvel tawp di kigenta himaleh Pathian in a mite Ama lam ah a kilekit diu dawina ziak in tuni tiang in hun a pia nalai hi. Ahin tusawng cheng buainate hi chu kum dangte guallo in a khawk ma ma ziang hi. Thil tung zosia Pathian hiatpi leh a thu ah tung ngawn a hia, gingtuten i bawl diu chu bangtik lai ah le Lalpa tuak ding ah kiman zing ah i um ding uh a hi.

“KUMTHAK KISAKLAWKNA”

(Lalpa nâ sêm hitiu ve)

~ Rev. Andrew LR Khiangte
i/c Mata Pastor Bial

Kum a hung thak hin mitin hi i lungthimu thak in kinepna thak i nei sek chiat ding u ka gingchai. Kumthak â ding ah tup te le ngaitua in lungthim te le thak in i thanuam viau sekui. Kum a hung thak sin leh kinepna sâng tak nei in zia kum chu mimal, sungkuan, kochuam leh gam â ding ah malzawlina kum a hi di i dawî chiatua ziagual ding ah chun Pathian kiang ah le i pauchap sek ui. Umzia nei zaw leh mumal zaw a eima, sungkuan leh Kochuam ah i masawnna ding ah kum thak masang ah hin kiguanggal lawk thei tamtak um ina.

Kumthak kisaklawkna hi lampi chuam chuam in zik thei ina. Zik mi chuam chuamte’n le hawi tak tak a ziku sim di um ngei ina. Tu kum ah hin chu Kochuam thil a hina ah zia lam chu nga’n kumthak â ding ah lungthim put mat hileh ka tite neuchakhat zik ziang di i hui. Ziate hi mimal phatchuamngaina a hi ti ei hiat

piak un ti’n simtute ka hung dawn hi.

1. Pathian ei kawina hiatchian:

Tulai i gam huinun tuak zinglai hin ngaituana sautak ei nei sak hi. Meitei gal ziak ah i buaina khêllam ah ei uh sung ah nam leh pawl kikal ah buaina kithial theilote leh a bîk in Vaiphei nam sung ah thawm hiat nuamlo tak hung um hin

ngaituana a sukha ma ma hi. Kumthak hung tung ding ah hin Vaiphei nam gual ah ngaitua in Pathian ei kawina leh ei guat dan hi bang a hi em ti ngaitua a pawimaw ma ma hi ka hiai. Thangkai leh Lungpau te i suang ah Chanchinpha meisel chî tû a hi i tiu. Ziagual chu a hi chun masanglai ah kipat khan Pathian in Vaiphei nam hi Chanchinpha buaiپی ding in ei guat ah, zia chu thupipen ah nei dite hilo i hiu ah a hem, ti'n ngaituana ka seng nasa ma ma hi. 1997 buai nung ah Kochuam mumal zaw leh kikaihuaina pha tak Pathian in ei pia, Mizoram Synod nuai ah Vaiphei tam zawte chu inkuan khatini um khawm tau. Pathian in a Kochuam hi ei hukdawna matchak ah a mat hi'n ka hiai. Tu naicha gam buai i tuak lai in le Pathian in Tangphai Presbyterian Kochuam mangcha'n ei chawihawi hi'n a kilang hi. Khawvel thil ah leh hatna ah chun suan di i nei puau ti i hiau a, himaleh Pathian in a Kochuam leh Chanchinpha mang ah ei kona

leh chawihawina hi ngun tak ah ngaitua kawm in kum hung thak ding ah hin Pathian ei kawina hiatchian gua'n i hun i mat a pawimaw ma ma in ka hiai. Joshua'n kei leh ka inkuante'n vang Lalpa nâ a hi ka sep ding uh a ti hi i lunggil kaihuaitu ding in mang hitiu.

2. A tak tak gam buaiپی a hun hi:

Pathian lungsiatna'n Kochuam det tak leh etnawp kham i hung hi to tau a. I thawlawm uh le mihing zat ngaitua in a tam tho tai a ti thei hi. Pathian in Mizoram Synod matchak ah mang in dinmun sâng tak ah ei kawi ah, a pakzu chawp ah nuam i sak zinglai ah haksatna manglam ah le i ngaitualo a hung tung thut ziang a. Ziagual dinmun ah kipat chun halthakna di i nei chiat ding uh ka gingchai. Pathian Kochuam umzia diktak hechian ah ziatak ah chu det tak ah i um a pawimaw hi. Mihing lungthim tak in Mizoram Synod tawh i kikhen hun i huphulna te hi a ziak

HINNA VÂK

ngaitua chian a pawimaw hi. Kochuam puitute hin - i mi te hin eimau keng ah din a nuam uh em aloleh a huphul uh em ti ngaitua ah, kisiampnatna di a um chun kisiampnat hun laitak a hi. Kochuam lopina pâkchen chu nuam in chawldam um tak ma ma hi'na, zia khêl lam ah pawimaw chu Khrist leh Kochuam â ding ah bang ka sêm thei a, banggual tiang ah kipia ka hi em ti hi eima kidawng kawm ah i theina zosia lân ding ah i kisingsak pawimaw ina. Kraws lampi ah chun mittui luang di le a um tapua thisan leh khawsa tui a luang zaw a hi ti gual ah khan, zia lampi chu paltheng ding ah i kisingsak a ngai hi. Pathian in lopina leh chawihawina ei tepsak ta, zia khêllam chu ei pui zel di a hia, i zui zel nadiam?

3. Kristianna hin i nam hinkhua chawikang hen:

Mizoram ah Chanchinpha in malzawlina a tun chungchang ah a gen seku ka lungthim ah kichian ma ma ziang pakhat chu, "Chanchinpha in ramhuai

a umbo" ti thu hi a hi. Mizo pi pu te hindan hawi leh lopi chu kisaktheipi leh suanum i sa zing nalai ah, a tawmngaina teu le i kizilsak zing nalai ua i ngai lul ma ma hi. Zia i pi leh pu te tho chun Jesu a gin masang un thitha a lau ma ma sekui. Jesu a gin nungua chun thitha te'n mun a chang tapuai. Chanchinpha chun a hinkhuau ah danglamna a tut hi. Tulai thil a masawanna lian tak leh danglamna pawimaw tak chu Lamzui chungchang kha a hi. Kochuam chun hun sawt tak ah kipat nam in i chiapi Lamzui a thi i ti seku chu a subei tai. Nausen dam a piang phawt chu mithi vui pangai ah vui di ti a hung hi tai. Zia kipat ah ka gen nawp chu Khrista i ginna hin i nam hindan hi a chawikang in a masawn sak di hilo a hi em? Vaiphei nam dan chuam chuam i neite ngaipawimaw lona lam hilo in Khrista Chanchinpha vak ah kipat in i nam dan a pha zo tak taklote leh masawn ngaite chu siampnat ngam a pawimaw ma ma hi. Zia lam tawh kisai

ah hin ngaituana i sen a pawimaw in ka hiai. Practical ma ma pakhat ka lungthim ah um ka gen nawp chu Pathianni ah mithi vui hun chungchang hi a hi. Pathianni ah mithi vui di i nei phatu leh Kochuam kikhawp hun laitak vel ah hin i kivui tangpiu a. Vaiphei nam chu i tawm ah i kihesuak tho ah i kingaipawimaw tua suak nalai ui. Sunday School hun ah Upa te le um beklo ah kikhawp a ngai chang a um zing sek ka gingchai. Zia laitak ah hin khawi zawk hi siamphat di a diam? Kikhawp pel ah mithi gal ding ah chia zawk chu a pha zaw diam? Pathianni ah mithi vui hun chawn vaigei deu zawk di a hi diam? Ngaituana a la seng ve tiamu!

4. Pathian leh a Kochuam kawi pawimaw:

Dan leh kikaihuaina lam chu i nei hawi in hiat le i he ta ma ma ziang ua, kipak a um hi. Zia chu a hi zinglai in kochuam nasemtute lak ah le ngaipawimaw di zawk helo i um nalai uh hi in ka

hiai. Kochuam programme a um zing lai ah mimal leh inkuan thil vaiguan siam ziang; Kochuam ah dinmun pawimaw tak tûkzinglai ah le pawlam thil ngai pawimaw zaw ziang. Kikhawp thul ah an nekkhawm tite hile mu di leh hiat khenkhat i um ziang uh hi i haisan uh chun masawanna pakhat hi ngei in a. Ziagual haw chu bawlllo ding ah a bîk tak in Kochuam nasemtute â ding in Pathian leh a Kochuam kawi pawimaw ti hi a umzia zil chian a kûl khawpmai hi. Zia lam ah chu masawn thei ding in i lungthim uh siam hitiu.

A khaikhawmna ding in, kum hung thak ding ah hin Pathian leh a Kochuam â ding ah kipumpiakna lam ah kalkhat a hem a sang ah nasa zaw ah masawn tup chiat hitiu. A chung ah i gen zosia ban ah le eima'n masawanna di hi ah i kihiat dan chiat in kal khat bêk ah masawn tup hitiu. Pathian nasepna hi i thupipen in kawi kit ziang phawt hitiu.

“LENKHAWP LEH KHANGLAITE”

~ *Upa Lalminsang*
Hill-Town

Hukdampa Lal Jesu pianni champha lawpna Khristmas i lah mat sekua mun pawimawpen lua chu Kochuam mipite ‘Lenkhawpna hun hih a hi’ ti leu hin a hethiamlo tamtak kiumta maithei maleh nidang in zia hi thudik a lah hithei ina. Pathian thugil tak tak sutna hunte sang in Hukdampa hung piang lawm in kipakna Luai- taksa lam(Nekkhawm) leh thagau lam(Lengkhawm) ûm khawm in, limna, kipakna leh thamuanna a lah chang seku a hi. Lenkhawpna di pawlbuk bawlo chu thil hitheilo gual in a lah gêlua, a mun lemchang in lemchanglo taleh pawlbuk siam thei dan dan in sak a hisek hi. Tulai in Kochuam in Hall-te, Sunday School hall neite a kitamta, pawlbuk siam khel ngailo ah nuam tak ah lengkawm thei a kiumtai. Tu tiang hin thingtang leh mun khenkhat ah gêl thupi a hi zing nalai hi.

Kochuamte â ding ah Pathian pâk ah Lenkhawpna hi banggual tiang ah gingtu hinkhua ah mun lua leh pawimaw a hi em ti thûk tak in sui gawlo maleu hin tawmcha’n holimna’n zia thu hi neileu hin a dawum hi. Tuni Khanglai tam tak, a diak ah kum 2000 nung lam ah hung nungak tangval dawkte hin sepna leh zilnate zia in Lusûn In ah lenkhawpna, mithi

zan hapina lengkhawm tilo mun dang ah lenkhawpna ah pang kha talo tamtak umta ding in a ginchak um hi. Chuleh, Lengkhawm ah pang sek maleh tuina neilo, kipawl khawmna chikhat gual mai ah gel khanglai tamtak umta hi in a lang hi ti leu hin thil hithei tak a hi. Pathian in a mite a pawl sekna mun pawimaw khat chu Lenkhawpna mun hih a hia, Bible sim leh pauchapte

bâh ah Gingtute â ding ah thil pawimaw ma ma a lah hidan hiatzing a pawimaw hi. Pathian biakna kikhawp Biak In sung ziang ah hin lê Kochuam mite Thagau ah limna thak chang i hung tam leh Lenkhawpna La hilo, khuang khat La sakte hih hawmthawna a lian ah, i thagau chanteu in daw khawplo in, ki-iplâna a piang hial sek hi. Zia hin lenkhawp hih gingtu hinkhua'n a mamaw tina a hi. Zia chu a hizinglai in tulai khawvel thîl in Biak In pawlam ah lenkhawpnate gêl pawimawna niam deu deu thei ding dinmun ah kiding ti leu hin dikna tiang um thei mai ina.

Kochuamte lenkhawpna hih Pathian tawh Gingtute kipawlna (Fellowship) matchak pawimaw tak pakhat chu a hi. Pathian pawlna mai hilo in Gingtu leh Gingtu kipawl khawmna a hi ziak in Len'khawm hih Gingtute â ding ah thil pawimaw ma ma, thagau lam An nekkhawmna, Pathian thu ngaithak gual tho ah pawimaw hi in a kilang hi. Kua Kochuam hi lehlê Kochuamte thagau lam

dinmun phat leh phatlo hiat theina leh kitêna pakhat chu mipi lasak khawmna a tui leh tuilo hih a hi tileu hin dik kimlo thei maleh thudik a hi. Thagau lam halthakna chang Kochuam zosiate chung ah thil tung chu lim tak ah mipi lasak khawmna a hi. Halna changtute'n Pathian pak khawm leh chawihawi khawm ah La sak khawm nuam a sau ah, ngui leh basam tam takte'n le zia hun ah hin halthakna a chan khawlaw hial seku a hi.

Khristmas leh Kumthak mang nuam leh lawting hi leh hilo kitêna pawimaw tak khat a lah hisek chu Lenkhawp nawp leh nawplo a lah hisek ah, Zan ni Zan thum a kizawm ah lengkhawm khawvak in, a châng leh Khristmas ah pat Kum thak tiang lengkhawm khawvak galkâi hialte a lah um sek u'i. Zia gual Kochuamte chu Khristmas mang nuam leh lawting a hi seku'i. Tulai in zia gual tuk ah lenkhawpna nuam a um nalai diam ti ngaitua khamting thei ding in a ginchak um hi. A ziak chu taksa lam luaithena nekkhawm bawltui

HINNA VÂK

leh tuilo chu tulai Khristmas
leh kum thak mat nawp leh
nawplo kitêna ding ah ngai
pawimaw khat a hung suakta
mai hi. Tui tak ah lengkhawm
sekte hile a tamzaw Nu leh
Pa, Pi leh Pute lamte a hi
deu tângpi ta a hi. Zia hin a
hun sukkhak thei chu tunung
hileh Kochuamte i lenkhawp
seku hi'n bei hun hung nei
ngei ding in a ginchak thei hi.
Pathian Thagau Thiangtho
zalenna mipi lasak khawmna
hin gingtute nun a chawm ah,
Kochuam halna pawimaw tak
le a hia, zia hi ngai pawimaw
ma ma a kul hi.

Tulai, tu hun et in khawvel
in a hun puakdaw Kochuam
â ding ah thil daw-umlo
tak chu mi dangte tawh
kipawl khawmna ngainatna
sang ah mimal leh changtat
hinkhua ngainatzawkna a
hung lian deu deu ah, zia
hin Kochuamte lenkhawpna,
Pathian pak khawmna khat
leh khat kisukhat tua sekna
ngainepna tiang tut hi in a mu
thei hi. Gen uang deu leu hin
tulai khanglai tam takte hih
Lusûn In ah lenkhawpna tilo

mun dang ah lengkhawm kha
talo um ngei inau. Nungak
tangval lengkhawm tam takte
hi tawmngaina zia a hia, zia
tawmngaina chu Pathian pawl
ah lengkhawm ah, hing tak
ah lasak khawm a hina sang
ah chiadan/ bawldan pângâi
bawl na mai ah hun mang a hi
kha thei hi. Khawvel masawn
dungzui ah kipawl khawmna
nuam Kochuam thagau lam ah
hatte nun leh zia kha paithâk
khak di thil lau-um tak a hi.
A chung ah holimna i gen
tâkteu gual in Pathian pak
ah Lenkhawpna hin gingtute
hinkhua a chawm ah, a suhging
ah, thugen thiamte'n thu
genzianglo maleu Kochuam
mite Lasak lenkhawm a
nawp leh Kochuam a lim ah,
Thagau Thiangtho nasep lopi
tak Kochuam in a tung sek hi.
Thutak thu ah kizilsakna ah
pat lasak tuina hung pawt sek
maleh chawmlo in a chuai pai
sek ah, sawm hing zel ding in
lasak lenkhawm a pawimaw
hi. Pathian Biak kikhawpnate
ah hin 1st Bell ah pat mipite
la sa khawm pan thei ding ah
kibawl deu i Kochuam mamaw
khat a hi.

“LALPA LUNG DAMNA” (Kisimna Lekhabu 14:8)

~ *Upa Sonmang*
Compound Veng

Hun leh kumte hungchia liam zel in, i khualzinnau khawvel ahin nisin hunsin ah News-te i hiat a hi chun kipakna leh thamuanna ding thute hiat sang in mihing lungthim phawngthei ding kido thuthangte, kithana gimnei tak takte (photo) muding a um zing ah, mihingte sualna hin huntawk nei talo a hidan a kilang mama ziang ah chuleh i khawpi sungteu i et a hi chun Khanglai hawi lai lai te’n le khawvel nawpchennate thala in zachakna leh kisuanlana neilo in Bazar ah te’n muding a tam mama ziangtau a hi, mit ziang ah i vak mutheilo, a mel et ziang ah le mipha mama dingah i ngaite sum leh pai muna ding a hi phawt a hichun khamthei guithei zuak ah Inchen hausak guatna ziak ah ten mi tamtakte suak ngawngkaw! ah kihen awk nalai um ngei ding i hui tihi kigen leh genkhial kihi din ka kigingchalo a hi.

1. **I Gam dinmun en thak hitiu:**

I gam dinmun i hiat taksau a hi, gâl i nei a, luang bangzat a h’em i chan ta. In leh lo tamtak i melmate’n a haltha tau ah, khua leh veng tamtak i chên tau a hi. Nunau chapangte lungngai Kâ aw thawm nisin hunsin in hiat

ding a um zing a hi. Galtai hinkhua hin kipakna umlo ding him a hi. Zia khawvel hi i khualzinnau gam a hi ti hezing in i lungngai ni, thakai ngawi ngawi ah i um ni’n le lungngai ah chau tha mailo ding in “*Gam neitu Lalpa*” lungdamna hi bang a h’em tia, Pauchap zing

HINNA VÂK

kawm ah “*Ginna*” i kalsuan
zel ding hi Lalpa kipakna a
la hi a hi. I gam ah thagau
ah gasua ding hi Gingtute’n
mawpuakna liantak i nei uh
a hi in a lang hi.

2. Khawtang dinmun:

Pathian hepina zia in i Pu
i pateu in a la lua nau gam
tuni tiang ah khangthakte’n
ka gam uh a hi i ti thei nalai
ua, khua khenkhatte, tu
dinmun in luazo talo in um
ziang leu hinle, Pathian
malsawmna gamte’n Bu
leh Bal, Thaichi (Lomathai)
apat malsawmna tamtak
takte i muthei ah, zawkthei
paitheite ah kipat inle
sum leh pai tam pi pi le i
lam uh a hi. Zia Pathian in
ei malsawmna i dawnteu
apat hin ei malsawmtu
Lalpa Pathian lungthim
natna i mat khak ding uh
a lau um mama hi. Eima
lawkna ding a hiphawt leh
Govt. a pat diklo tak tak
ah sum leh pai tamnate,
muna diklo a muna ten,
i khawtâng dinmun hi
a sukipak din gingchak

a umlo a hi. Nidanglai
deu vak ti maileng,
khawtâng ah ten kihepina,
kidawisakna, kingainatna,
kidsawisaktuanate hi ipi
ipu teu gothil lul tak ala
hi a hi. Tulai khangthakte
hin pi leh pute’n thil pha
mama khawtâng ah ten
a la sawm teu sawm zo
talo dan in i um tau ah,
mani masial nate leh du-
amnate zia in khawtâng
hindan ah ten kihepituana
a tasam ta mama in a lang
hi. I khawtâng, i vengsung
vaihawm tute a ding ah
haksatna tuntu i hi khak a
hi chun kingaitua in kisudik
thak thei lehin zia chu Lalpa
lungdamna chu hi ngei ding
a hi.

3. Insung dinmun:

Khawvel leilung a la kisiam
til apat in Inkuan hi a la
dingta a hi, tu tiang in
Inkuan khat ti in a tam le i
um ah a tawm le i um uh a
hi. Inkuan kitih Pathian in
a la din chu a hi. Tun hin
nang leh kei Lalpan Inkuan
eila din zia hi bang zia

pen in ihiau em? Joshua'n kei leh ka inkuan ten vang Lalpa na a hi kasep ding uh (Joshua 24:14) a la ti a hi. Kingaitua hitiu, mo leh t êk kikal, Pa leh chate kal, taksa leh thagau ah i um dan teu hi Lalpa lungdamna Insung i hi na diam uh? Taksa gam ahinle malsawmna sum leh pai a te, damtheina a ten, Inmun lo mun a ten malsawmna i chang nuam uh a hi. Pathian apat malsawmna dawng ding in nang leh kei Insung dinmun hi ei siam tupa Lalpa lungdamna leh kipakna pen i hi na diam kingaitua thak tiam hitiu. Chate etkawl na kawng a hinle i insungte ngaitua thak kit hitiu. Cha lungsiatlo kua um ding a hi em, i lungsiat dante hi eisiamtu Pathian kipakna a hina diam? Chun, chatenle i muthei lei Pathian i nu leh pa te chungah taksa malsawmna i dawn theina ding tiang in thilpha i bawl nau em? Kingaitua hitiu aw.

4. Mani kietchian hun a hi:

Sam 139 i sim a hi chun mihingte hi Lalpa'n ei hechian talua a hi. Lalpa mâ i kisel theina ding umlo a hidan i mu'u a hi. Nisin i hinkhua matna kawng in i umdante, i kampaute, i nek leh dawn thil a ten i hinkhua ahin ei siamtu Lalpa lungdamna i hina diam? Sum leh pai thangai nate, semgimlo ah hausaknate, eima lawkna ding a hi nak leh diklo tak ah mu guatnate le khaw sakna neilo, i chenna gam khawvel ahin ei hechiantu Lalpa mitmu ah aum ngei ding gingchak a um a hi. Mani hinkhua hi, midangte a ding ah malsawmna i hi ding hi ei siamtupa Lalpa kipakna hi ngei ding a hi. Midangte sunatu gingtu i hi khak ding uh a lau um ah, mani kietchian a hun takzet ta in a lang a hi.

Lalpa lungdamna leh kipakna chate hithei di'n simtute zosia Lalpa'n malsawm ta hen.

“MANI DINMUN HIAT HI MIDANGTE DINMUN HIATNA LE A HI”

~ Upa Kaikhanpau
Leisang

*“Israelte lak ah kei kua ka hia, ka Insung mite le kua a hiu ah,
ka pa Insung mite le kua a hiu ah a hem, lengpa makpa ka pan
mai ding chu” 1 Samuel 18:18*

David hi Juda gam Bethlehem khua cheng Jessi chapa pagiatte lak ah a neupen a hi. A pa Belam ching ah pang a hi. Jakob cha Juda phung ah piang a hi. Zia hunlai ah hin insung hausa neining ahi leh hilo vang chu i hepuai, khua neucha cheng ahi ti vang chu i hia, zia khua chu i Lalpa pianna khua a hi.

David hin ama a vak kien ah, a insung mite leh a Pa insung mite le a vak en a, Israelte Lengpa mâkpa vak pan ziang di chu ting kisalo hingei hi'na. Pathian namtêl Israelte Lengpa mâkpa vak pan ziang di chu mihingten pawlam latdan in a en ua Pathian in vang lunggil lam a en hi ti hi vak hedawklo a hi diam (1 Samuel 16:7). Ei uh le vak kien tiam hitiu, i saphat ziak, i melhawi ziak,

i lekthiam ziak leh i insung khawsak thei ziak ah Lalpan a Kochuam a mitel chuamte enkawl di leh puihuai ding ah ei guat ziang hi i ngaitua ngai diam uh. Kuama hi i Pathian ma ah ting kisa kiumlo a hi. Piandan pha, thiamna leh pilna a pawimaw nai himaleh a pawimaw pen chu Lalpa kengbul ah Pauchap a Pathian keima tinglo pen tak hi la mite enkawl di leh chawm ding in lei

vak guat a, lei kithuapi lei umpi ka pawimaw hi tiin kingaitawm tak in dawn le hin ting ah ei ngai a ei pansak tu chun i pawimaw leh i mamawte ei pe nalo di a hem.

Solomon inle Pathian kiang ah a pauchap a Pathian in a dawtlo a pawimaw hausakna le a pia a hi kha (1 Lengte 3:7-13). Pastor leh Upate dinmun hi a pawimaw ma ma hi. Khawvel ah vaihawmtu President leh Prime Minister te'n phataka vai a hawm theina dingun le i pauchap piak uh a pawimaw hi. Van khawpi/Van khua leh tui hina neitute i hui ti hemil puai tiu.

Kochuamte le kingaitua hitiu i dinmun thupi dan leh lopi dan, Lalpan dinmun sangtak leh lopitak in ei dinsak hi. Malai ah Israel nam 12 Pathian Namtelte sang in Kochuam hi a thupi zawi. Nam 12 te kha Isak in Esau leh Jakob a hing ah, Jakob in cha 12 a nei a ziate bep cha kha a huap ah. Esau suan le huaplo a hi. Kochuam in a hileh Esau suan, Jakob, Jentel khawvela mi

zosia a huap hi. Kochuamte hi Pathian chi teldaw Lal thiampu, Nam thiangtho leh a mite leh a chate i hui (1 Peter 2:9 ; 1 Johan 3:1). Kochuamte i mawpuaknau leh i thuneina le a lian a, khawvel gam zosia chia ah Khrista chanchinpha henailote hiatsak. Zia ding a chun sum leh pai, pau hiat le ngai ina. Bang hileh mani umna chiat ah i Kochuampi gingtute nasepna panpi dinga bangkim hithei i Pathian vak ko leh vak chial hi i mawpuakna khat leh i nasepna khat a hi. *"Ginum in ei ngai a, a nasem ding in ei pansak a" 1 Timothy 1:12.* Chuleh, gingtute mawpuakna dang khat chu Biak-In ah chia ah pauchap, a Pakna la sa, a ma chawihawi leh a thu ngaithak. *"I kikhawpna teu haisanlo in kitil hatzaw diak hitiu" Hebrai 10:25*

A tawpna ding in i Pathian kiang in "Pathian keima hi kua ka hia, ka insung mite le kua a hui a, ka Lalpau Jesu Khrista zal a la na sem ding leh cha hi ding in lei vak guat ziang hi". Lopina leh chawihawina chang in. Amen!

“EI AN KIPAK A UM”

~ *Evan. Kailianthang*
Phaiba

*Ngai tiam un, Pa'n ei hepina ziak ah Pathian chate ei sak tâk
hi a nasa na lawm lawm e! Zia gual ding chu i hi him uh a hi.
Ama chu khawvel in a hetlo ziak in, ei haw le ei helo a hiu.
(1 Johan 3:1)*

La phuaktu'n, 'Ei an kipak a Lum hukdampa hung piang chu, maleh Van mite ka thîl in a ngai pen uh hukdampa, khenna'n La a lem ui' ti'n La in a phuak a, chun kenle ka ngaitua a hileh Pathian in a hepina, na lopi tak a hun sepna mihingte'n a hepitu Pa Pathian thupiak bawtsia a kisel mangsan nung ua Pathian huansung thiangtho Eden huan nusia, thina thim nuai ah a la chu tate chu a cha sak ah kumtuang hinna a chankit theina ding ua lampi a hun sial dan hi Pa Pathian leh Van mipite din lungngai um tak leh thawmhau umtak a hung

suakta, zia lei mihingte Pathian cha sak ah a hung umkit theina ding ua tatna na hun siam ding a chun, Van ah mipi sim senlote lak in a hawl vel ua, kuama a mu tapuau ah, chun lei mihingte lak inle a muzo diaklo uh a hi. Zia chu Pathian in a hepina tawpkhawk in, a chapa changkhat a neisun a kipakna ma ma Van ah mipi ten a Lalchutpha ah kichu Pathian Belamno chu a thiangtho ti ah a chawihawi chimlo uh chun, a Lal lukhuk leh a Lalpuan te hun lip in a Lalchutpha lopi hun nusia lei lam a hun zawt ni zet hin chu, vak ngaitua tia Van mipite hindan di chu

khenna'n La a hun lem ua, Khawvel ah mi nuainung pen te belampute kiang in thu a hun tut tau ahi kha, a lopina chunglam Aksi'n le a hun zui pek a, a nusia ziang ngamlo a hi kha. Chun Van mipi ten Bethlehem khua Ganbuk sung ah Mary puan thim bel ah um, a chawihawi chimlo uh Pathian Belamno Gan Ankuang ah sial ah um Van miten a nung kitsan niu hih chu a haksa na ding e, a lopina Aksi'n vang a nungkit san ziang ngam pua, a chung zawn in a thil zing a hi kha.

La phuaktu ma'n, Ka han ngaitua in Lalpa kipaklo thei

kei puai, ti'n a ngaitua ahi kha, nang inle vak ngaitua tia a thupi na lawm lawm e maw? Pathian in ei hepina hi Kumtuang gawtmun ah thuak ta dite, Kumtuang hinna ei pia kitta, a cha ei sak kit tâk hi, ziaziak hih ei vei maw, La phuaktu'n Ei An kipak a um hukdampa hung piang, a cha ei hung sak tak hi. Zia ziak ah hin ei uh le kipaklo thei i hipuau, ei hukdam ding ah a hung pian ni Pathian cha sak ah i um niu Khristmas ni ahin lim in Van mipite thasang in thil githei cheng tawh thua in chawihaw hitiu Pathian Belamno chu. Amen

MI DINMUN HECHIANLO IN KUAMA DEM KIN

Tangval pakhat kum 25 ding vel mi khat hi a pa tawh rêl (train) in a chuang ua, rêl tukvan apat a thil mute chu a pa kiang in thanuam tak in a hung gensawn sek a, "En tia hepa, thingkung te saw! A nungtai ui!" a hung ti chu a rêl chunpi'u midangte chun mak a sau a, tangval pakhat umchan ding ah chun naupang huai a sau a, bangma genlo in a kisûm ham ham ui.

Chawmkhat zaw in, "En tia hepa, chunglam ah sûmte khin ei zui ui!" a hung tidawk kit a. A kiang ua umte chun khawksak tak in a pa chu, "La

chapa hi doktor thiam la etsak kha ngai em?" ti in a hung dawng tau a. A pa chun, maisua tai tak in, "Ka etsak a, tu hi hospital apat hung pawtdawk kahiu. Ka chapa hi a pian apat khua mu theilo, mit thûm a hia. Doktor in a mit a siamphat piak a, tuni hi a khaw mu masakna pen a hi" ti in a dawnhu hi.

Mi dinmun hechian masalo in kuama dem kin. Mitin in chanchin kinei chiat a hi.

~ Courtesy: Social Networking

“TUIHING LUI” (Johan 7: 37-38)

~ Rev. Minthianboi Vaiphei
i/c Phaipheng Pastor Bial

I chângtel ua “Kut” pen hi a bung bullam ah *Biakbuk kut, Bawkcha kut* tite tawh thumun khat a hiu. Israelte khan Bawkcha Kut hun ahin **Sâwlbawk In** te sa’n Pathian pawlna hun bîk a la mang sek ua. Sâwlbawk ah In kisa hin nidang ah *Khristmas leh Kumthak* mat na dingah **Hall** i la sak sek hunte’u ei geldaw sak vung vung ah, lunglên a kaitho hial chulam e! Tuhun ahin kochuam masawinna zia in Hall kitup tak tak te i nei tau ah, khangthak lamte hin ziahun lai boruak lim umdan kha tep pha talo tithei hial in ah. Judate chun Bawkcha Kut hi amau thasim dan ah **tha sagina’n** (*ei uh â ding ah October tha vel*) kâlkhat sung veng veng a la mang sek ui.

Zia Kut hin umzia thûktak a la nei a hi. Aiguptate sal ah a tanna’u genthei umtak a pat Pathian in a thilhitheina, mihiam ngaituana’n a batphak lo zen ah lopi tawh a la puidaw lai ah Israelte **dinmun** kha a hiatmillo hial na dinguh leh, Pathian a bêt tinten uh a kul zia a hiatzing nading ua zillai a la piakna ahi’i. Joseph hunlai

ah **Goshen** gam - Aigupa gamsung ah **gam special** tak ah a la khawsate kha puidaw a hihun ua hichu Sâwlbawk ah kisa In ah a la khawsa mai mai ta a hituak ua, nuamsa tak ah khawsa ding hileu kilawmtak a hizing lai un gentheina namenlo thuakpum ah a la thupi hehu lo hial hin au.

Lal Jesu hunlai ah Bawkcha Kut a matzing lai uh hun khat a chun Lal Jesu chun Pathian Gam chanchinpha a tângkopi ah. Sakhaw lam ah puitu leh lungthim hawilo gêlte khut ah puk pawlkhat chun Lal Jesu chu, tulai paukam hileh *matdaw ding, he-dawk ding* ti'n pan a la'u ah. Maleh Lalpa Jesu chu a hun a tunnailo ziak in bangma a law ngam puau. Hangsantak in a thu gennawp leh a gen utdan gualtak in *"Tuihing lui"* a hizia, a ma beltute a pat le luang sawn ding a hidan kikodawk hial in a gendawk tho tho a hi.

I Lalpa Jesu'n a hina tak a tângkopi hi Thuthung Lui hun ahZawlneitekhanalagenlawk zo kêi tau a hi. Ezekiel 47:1 na a khan Zawlnei chun *"sualam nga Tempul kawtkhak bul nuai a pat tui hung pôtdawk leh a hung luandawk"* thu a la gen ah. Chûk hun ah gawtui tam ziak ah tuisam hung pôt te a hung tam phatleh a ngatna zawn ah a luandaw zel dan ihiatsa'u a hikha. I Lalpa Jesu nasep dan hi giltak ah i et

chun a umna mun mun leh a kiheina lam lam ah mite kiang ah *luandawna nasep* ngen tawh a hinkhua mangtum a hi'i kitileh ki genval khel puan ah. Kinunghei kit talo ding ah ginumna zosia tawh Lalpa nungzui ding ah kilântate hin, i kiziltilna'u gual ah i puanbuk te'u **kêk lian** in i kihiau em? Alelam ah **zîm talua** ah *"luandawna"* kiti paukam him him le i nakhang ah kithâwl talo lampang le a kihikha dia aw? I thupukna siamzel nate ah chona liantak le hingei ina e maw.

Tuni'n khawitak hilele i umna'u mun chiat ah i theikham ua luandawna nei zing tate le hi'itieu. A *'huntai'* tihi mihing lunggel pangai leh *'a talaw deuta e'* i ti nawp hun le maitua chiat le hita'itieu e maw. Unau dawitak, i hina'u diktak vang *"tuihing lui"* neitu leh kawltute i hitâk ziak un i sung ua pat Lalpa a luandaw zing theina dingah a talua umlo ah **i kihawn** uh ngâi a la hizaw e! I khut ah um na na na chu a pawtdaw dingdan

HINNA VÂK

kha ei khêl ah thuneitu umlo a hi. I tutâng thei a, neucha leh tamtak i pawtsak tawh kisai kha eima thu liau liau a hi. Tutiâng ah i panlaknate'ú a hin eimau a pat i Lalpa luangdaw k tam taw k ta ti'n i lungmuang ngam tadium uh le..? "**Lui**" ti minpu tui kigawmkhawm chu tui malkhat, malni a hilo dan i hiatchian takluat uh a hi. Tui luangdaw k lo ah um sawtta a gimtuilo dante, a buak ut dante, natna tutthei tamtak piandaw theina a hizaw k dante hechian ma ma tate'n i sung ua tuihing a luandaw zawmdi khaktantu ah kipang khalechu **tawmngaina phachuamlo pen** hi hial di eive maw.

Khaile, gingtu lunggel pa-ngai tiang neita khat chu Kochuam, KNP leh KKP khat

pen pen phual ah kium ngei a hi. I umna'ú mun leh i ngatna'ú mun a khan tawsawttu, dinpitu, mâ latu kineppi um i hi em? Ahiloleh mani lunggel in dik a sak tiang khel ah masawn theina umte '**daltu tawmngâi**' i hizaw khadium? Lalpa â dingah panlakna zia kah gu leh châng keu hial lele midangte châwmthei ding khawp ah tuihing kang ngailo gual ah puihuai leh sukhath ah um dingte chu ama **beltute** a hidan hethak hitiu (Isai 58:11). Lalpa'n ei kawina mun ah midangte tawh luangkawm theilo gingtu khat himai mai ding in i pamai taluau. I theina mazawn chiat ua tanlo ah luangdawktu, midangte le chawm hing thei khawp ah **tuihing** hizel ding in mâ lazel hitiu e.

Chungnung pen ah **Pathian** chu, **lopi** tak in um hen
la, **lei chung** ah a **dawisak** ma ma **mihingte** kiang hin
chamna um ta hen!

“LITERATURE PAWIMAWNA”

~ Upa Dr. Soilalsiam
Lingsiphai

Literature ti thumal hi Latin pau ‘*littera*’ ti apat lâkdaw a hia, zia chu ‘pau thumal’ tîna a hi. Literature hi ‘thumal kilemkhawm in umzia dawî-um tak a siamdaw’ tî in le a gên thei a; a bailampên a chun, ‘pau khat mangcha thuzik’ tîna a hi mai hi.

Literature leh Pau hin umzia leh hîna chuam gêl nei maleu, khentheilo khawp ah kinai leh kizawpmat a hîu. Pau hi Literature â ding ah thu puandawna matchâk a hia, literature siamna di leh hilchetna ding ah bulphû (*foundation*) a hi. Chun, Literature hin ngaidân thûk tak tak genchianna ding in, thumal leh thutawn kilepdân thak thak siamdawk in, Pau hi a suhlian a, a suhhausa zêl hi. Zia hin Pau thilhî theidân leh phazaw’ siamdanglam thei a hidân a latsak hi.

Thuthung Lui hun apat khan lekhabu hi a la pawimaw ma ma ta. Exodus 17 na in Pathian

in Mosi a kihopina zosia kha Mosi’n a zîk tha vek hi ti mûthei a hi. Thuthung Lui lam ah Pathian thute leh Thuthung Thak ah Jesu chanchinte hi a la kizîk thalo in, kigensawn thaw mai mai a la hileh, tamtak mangthâi intin, vângsiat um ma ma di a hi.

Literature hi mihingte leh nam khanto kipatna bul a hi. Thukizîk min a sim thei a, a zikthei a, a matchâk thei phat leh khantona in a zui sek hi. *Literature* hi kihettuana matchâk a hia, ngaituana a suhlian hi. Vangphat um tak in, kipâk ni - dâ ni ah sak di lâ leh gen di bîk i nei ua, zia hi *literature* neilote’n a neilo uh a hi.

HINNA VÂK

Lam chuam chuam ah mi lawtingte him him hin lekhabu a sim nasau a. Lekha sim manlo khawp ah *Social media* leh *technology*-te ah i buipi lai un, a siamdawktute- Elon Musk (*Space X*, *Twitter*, *Tesla Inc.* neitu), Mark Zuckerberg (*Facebook* leh *Whatsapp* neitu) te'n lekha simna di hun a nei thei zing ui. Thil lopi leh phachum bawldawna ding in *literature* ngai pawimaw leh lekha sim tam hi bawl mâkmaw a hi.

Lekhabu apat hin midang in thil athîl dan uh leh a mû dan uh hetthei a hia, zia hin pilna tamtak ei pe thei hi. Lekhabu hin mihing hinkhua a hei danglam theina di thahâtna (*power*) a nei a, khawhei, ngaituana leh ginchakna a siam danglam thei hi. Karl Marx zik *Das Capital* hin khawvel a la sang danglam zo a, *Democracy and Communist* in a khen chawt mai hi. Chun, USA ah suak zalênna a-um theina ding ah malâkna (*movement*) kipatna chu Harriet Beecher Stowe in a zik *Uncle Tom's Cabin* lekhabu zia ah kha a hi.

Zia gual khawp ah mi lungthim sukha thei leh sâng danglam theitu *literature* hi ngaisân thak a pawimaw ma ma'i. Paul in Timothy kha le lekhabu sim hâbawl zêl ding in a vâithâk a hi kha.

Khristian missionary-te'n Lekhamal ei hung siampiakua, thiamzilna a hung kipan ah, awl awl in, *literature*- kampau leh hetna mai ah um chu zikthaw in a hung sângtha hiai hiai ta'i. *Literature* ei la siam piaklo in, neilo leu hin tû dinmun hi a la tung khello di i hiu. Ahin, khawvel khangto zêl leh gam/pau changkâng zawte ettawn (*influence*) zia in, Pau leh *literature* neute kepbitna ding in haksatna a lian deu deu ta'i.

1. Bang zia ah Pau kepbit pawimaw?

Mihing hinkhua ah thil pawimaw kizawpmat pathumte chu mimal, chawndân leh Pau a hi. Pau matsua hi chawndân leh hîna mangthâi tîna a hi. Khawvel ah chawndân chuam chuamte hin khawvel a suhbukim a, a hawisak bân in, Pathian

guatdân le a hi. Pau hin kuate i hieu em ti a hilchian bep hilo in, mimal hîna leh khawsakdân in (*impact*) gên a nei nasa ma ma hi. Zia zia chun, mihing khat in a pau a hetmil chun, a mi-hîna leh a bul mansua tîna a hia, mûmallo leh bul neilo, mithak tîna a hi.

UNESCO (*United Nations Educational, Scientific and Cultural Organisation*) te gendân in, 'Pau hih a mangtu 10,000 sâng ah tawmzaw a hi chun, mangthâi thei dinmun ah ding a hi'. Ziate chu Census ah *Official* Pau lak leh Nu-pau kiti lak ah ziklût a hi ta puai. Zia zia chun, Census ah Pau kizîklût chu 108 in a kiam khawlaw hi.

Atlas of the World's Languages in Danger ti lekhabu chun, 'India ah hin Pau 196 (*endangered*) mangthâi thei di dinmun in a um ua, zia lak ah Pau 80 chu India Mâl-Sak (*North-East India*) gam ah paute a hi. *North East India* ah hin pau 200 vêl a-um a, zia lak 80 vâl hi, kum 50 sung ah mangthâi di dinmun ah um a

hiu. Etsakna, Sikkim ah nam khat *Majhi*-te khi, mi 24,000 vêl himaleu, a pau uh mang chu mi 4 bep um ta hi'n a suidawk u'i.

Pau leh Literature ngâi pawimawlo nam chu mangthai di a hieu. Khawvel in Pau chuam chuam tampi a mangthai ta, hun sawtlo sung ah mangthai dile tampi a um hi. Zilmite'n, Pau mangthai zêl di a ti lak u'a hi, ei uh Pau le pang a hi.

I Pau zil thiam leh matdik hin, i chawndân leh i-pu i-pa apat i-dawn thilte luldân ei hetdawsak ah, i bul ei ngainat sak hi. I pau mat hin sungkuan kizawpmatna bân in, nam kizawpmatna a suhhât a, nu-Pau manglote chu sungkuan mi tawh le a kikâk mai sek u'i.

Hetna leh pilna khanletna ding in Pau thiam a pawimaw a, pau dang thiamna ding inle eima pau thiam masak phawt a pawimaw'i. Zilmite chun, 'naupang nu-Pau thiamte chun, pau-lian dang le a man vak diak u'i'. Mani pau thiam mumallote chun pau dang le a hethiam thei tak tak sek pauu.

HINNA VÂK

2. Pau leh Literature kepbit didân

Pau kepbit leh khantosak hi, a Pau mangte mawpuakna liau liau a hi. Pau kepbitna ding ah phachuam khenkhatte chu:

1) Nisîn ah mat: Insung kihotuana ah i Pau mat têi têi di a hi. Chun, nisîn ah Pau mat didân leh pau/literature kepbitna leh dawpsânna di phapên chu Bible leh lekhabute sim tam a hi. Lekha sim hi hêtna leh pilna kibêlapna di bep hilo in, i mi hîna leh nam-zia a suhdet a, mûmal tak ah hinkhua mang ding in ei panpi hi.

2) Chênkhawm: Pau khat mang sungkuan tamtak chênkhawmna chun, a Pau matu chu suhdaltu di umlo a hi zia in, kepbit a bailam hi. Zia hi nam bitna leh damna ding inle a pha ma ma hi.

3) Kichênna: Pau kepbitna pha lampi khat chu Pau kibatpi tawh kichên a hi. Pau lianzaw leh kimang tamzawte (*majority*) tawh kichên chu, Pau sukdalna leh manthâina lampi phatak a hi thei hi. Gingtute â di diak in, pau

kibatpi bep hilo in, kochuam thugin pawm mi ngêi nei ding ah panlâk a pha'i. Zia hin, ei leh ei kingaisântua pawimawdân le a kilang hi.

4) Thu kihettuana (*News & Media*): Thu kihettuana *Newspaper* hi gam pum-huap ah neilo i hia, zillai - sepna hawllâite'n, gam-pum huap chanchinbu (*English Newspaper*) a lâk tâk un le, tualsung chanchin chu i Pau ngêi ah kizîk lâk hâm hâm di a hi. Chun, Social Media-SMS, WhatsApp, Facebook, Instagram, X (Twitter)-te ah le i Pau hi a thei chan ah mat di a hia, kinaw zia leh hetthei a hinâi tia, bailam hawlo ah, diktak ah zik sek di a hi.

5) Pau chuam matlo di: Pau chuam matlo di tî hin pau-lian, *International*, *National* leh *State* paute genna a hi pua, i chênkhawmpi thingtâng pau dangte genna a hi. Suantu kibang hileu hinle, Pau chuam chuam neite i hui, i pau suk-hât/suk-larna ding ah chun, mat tam leh mat dik a pawimaw khawp mai hi. 'I Pau hi mangthâi leh le a khawk

puai' tî i hilo chun, pau chuam matlo ngam di a hi. Pau chuam mangte chu amau pau ah ho khel khel hi changkâna a hi pua; i-Pau zâchâtpîna a hi. La kihopite'n hun pâkcha maleu, a gûk tak ah hung ngâisâng kêilo a hui; zia chu zâchât zawk di a hi. Tualsung pau chuam chuam hêt tam a pawimaw pua, pau he tam nuamte'n, *State* khat pau tiang bêk leh Gam chuam chuam ah mat thei di paute hêt guat zawk di a hi.

Pau kepbit leh *literature* khantona di hi, kuate a h'em khat in ei hung bawlpiaik ziang thei thil a hi pua, a neitu- ei uh zosia mawpuakna a hi. Pau leh nam khantona ding ah pawimaw ma ma, i ngainêp sek uh chu- ei leh ei kingaisântua, kisawmdawltua leh kidawisaktua hi a hi. Ziate hi nam khantona bul, chawpkân theilo, thilte a hi. Midang pilzaw, hawizaw leh thiamzaw ding ah ginchâkna hi, khantona ding ah mêlma lianpên khat a hi. Midang thil phawt ngâisâng ah, ei-â ngainêp i hui chun, i Pau leh

Literature khangto theilo di a hi. Etsakna; Nasep di neite'n a sêmthei eimi hawl di, In sate'n – eimi mistry, dawr kâite'n-eimi dawr hawl chiat guai tiu. Thil neucha-cha, i ngainêp sekteu hin thil lianpi suhse thei a hi, ti he zing hitiu. 'Eima'u le midang sâng in i nêp diak puau a, i thilteu le midang â sâng in, a nêp diak *puai'*, ti lungthim nei chiat ding in pan la'i tiu.

Pau leh *literature* khantona di leh a dinmun chu mimal tin pau matdân leh thiamdân in a kilang sek hi. Zia ziaik chun, nam sung ah mimal tin hi, Pau kêmbittu leh khantosaktu mawpuakna tu chiat i hui, tî kihetmillo di a hi. Pathian in ei guat piaik, i Pau mangthâi ziang dia i phallo chun, mitin in pan i lâk chiat uh a pawimaw takzet ta'i.

I hinkhua ah hin thupûkna (*decision*) neupên apat a lian tiang siam sek a pawimaw a, i siamlo chun midang ahiloleh khawvel in ei siam piaik tho tho sek a hi. Pau ngâikhawk thak di leh lekhabu sim tam ding in thupûkna thak siam chiat leu hin nawp a-um khawp mai hi.

KNP HUANG

PWF/PCI in Manipur buaina ziaak ah Manipur ah PWF Unit-te
kiang ah Relief fund Nuai 2 (2 lakhs) chiat a hung piak uh chu
ei Tangphai KNP chun, gâl ziaak ah eila beisan i Kochuam mite
leh haksatna tuak bîk, mi 7-te kiang in sûnpina leh thawkpina
thilpiak cheng 10,000/- chiat piak a hui. Amau chu -

- 1) Pu Kamlallian h/o Pi Doiting, Kangvai
- 2) Tv. Pausuandam s/o Pu Paulian, Kangvai
- 3) Upa Soitinkam h/o Pi Khawlniang, B. Phainuam
- 4) Tv. Nengkholun s/o (L) Upa Soitinkam, B. Phainuam
- 5) Tv. Richard Hemkholun s/o Pu Khupkothang, Nazareth
- 6) Nk. Thiamthianhoi d/o (L) Upa Soitinkam, B. Phainuam
- 7) Pi Lamnu w/o Pu Thangboi Vaiphei, B. Phainuam



Tangphai Bial huap ah Frontline mun 8 ah chini leh thingpiche a
nuai ah gual hin piak a hi.

- | | |
|------------------|------------------------------------|
| 1) Kangvai | : Chini 2 bags + Thingpi che 2 kg. |
| 2) Torbung | : Chini 1 bag + Thingpi che 1 kg. |
| 3) Mualngat | : Chini 1 bag + Thingpi che 1 kg. |
| 4) Laika Mualsau | : Chini 1 bag + Thingpi che 1 kg. |
| 5) S. Kawtlian | : Chini 1 bag + Thingpi che 1 kg. |
| 6) New Dampi | : Chini 1 bag + Thingpi che 1 kg. |

December 2024

- 7) Dongjang : Chini 1 bag + Thingpi che 1 kg.
8) Leilon : Chini 1 bag + Thingpi che 1 kg.

Chuleh, Relief In sakna ding in Synod Relief Fund ah ₹ 90,000/- piak a hi.

